



Sumáriu Kazu
Tribunál Judisiál Primeira Instáncia Baukau
Fevereiru 2025

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Judisiál Primeira Instáncia Baukau

1. Totál kazu ne'ebé JSMP monitoriza: 32

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	18
Artigu 278 (1) Kódigu Penál (KP)	Falsidade iha depoimentu ka deklarasaun	1
Artigu 145 Kódigu Penál (KP)	Ofensa ba integridade física simples	1
Artigu 154 KP no artigu 2, 3, 35 no 36 (LKVD)	Maus-tratus ba kónjuje	1
Artigu 234 (1) Kódigu Penál (KP)	Obstrusaun ba liberdade atu hili	1
Artigu 185 Kódigu Penál (KP) no artigu 258 Kódigu Penál KP	Violasaun domisili no danu simples	1
Artigu 139 Kódigu Penál KP, 23 KP, 24 KP no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Tentativa, tentativa nia punibilidade, omisídiu agravadu no arma brankas	1
Artigu 178 Kódigu Penál (KP)	Aktu seksuál ho adolexente	1
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD) no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Ofensa ba integridade física simples ho natureza VD no arma brankas	2
Artigu 252 Nu.1(d) Kódigu Penál (KP)	Furtu agravadau	1
Artigu 259 (a) Kódigu Penál (KP)	Danu agravadu	1
artigu 2(nú.1(b), nú. 2(f)), artigu 20(nú.1) no artigu 19 hosi Lei Nú. 5/2017	Arma brankas no uzu rama ambon	1

Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD) no artigu 148 KP	Ofensa ba integridade fízika simples ho natureza VD no ofensa ba integridade fízika negligente	1
Artigu 171 Kódigu Penál (KP)	Koasaun seksuál	1
Totál		32

2. Totál desizaun ne'ebé JSMP monitoriza: 20

Tipu desizaun	Artigu	Númeru
Pena prizaun	Artigu 66	1
Suspensaun ba prizaun nia ezekusaun	Artigu 68 KP	7
Pena multa	Artigu 67 KP	8
Suspensaun ba prizaun nia ezekusaun no Pena multa	Artigu 68 KP no Artigu 67 KP	1
Pena admoestasau		3
Totál		20

3. Totál kazu ne'ebé sei kontinua prosesu tuir JSMP nia monitorizasaun : 12

B. Deskrisaun sumáriu julgamentu ba desizaun kazu sira

1. Krime ofensa ba integridade fízika simples ho natureza violénsia doméstika

Nú. Prosesu : 0093/23. VQVQQ
 Kompozisaun Tribunál : Singulár
 Juísa : Dra. Sribuana da Costa]
 Prokuradór : Dr. Julio da Silva Correia
 Defeza : Dr. Grigorio M. L. de Lima
 Desizaun : Pena multa US\$30.00

Iha 04 Feveireu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguida BS hasoru nia la'en, iha Munisípiu Vikeke.

Akuzasaun Prokuradór

Prokuradór akuza katak, iha 11 Dezembru 2023, iha oras tuku 14:00 lokraik, arguida uza ai-baku dala ida iha ofendidu nia ulun, baku dala ida iha hasan parte loos, basa dala ida iha hasan parte karuk no tata ofendidu nia liman kabun parte loos no karuk. Antes agresaun ne'e arguida ho ofendida diskute malu kona-ba ofendidu deskonfia arguida ba mane seluk.

Prokuradór akuza arguida kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguida deklara katak faktu iha akuzasaun ne'e loos hotu, momentu ne'e ofendidu mai ho kondisaun lanu hakilar arguida ho nia oan sira dehan sai hosi uma, ne'e mak arguida komete aktu ne'e hasoru ofendidu, seidak di'ak malu, arrepende ninia hahalok, foin primeiravés mai hatan iha tribunál.

Alende ne'e, ofendidu konfirma faktu sira iha akuzaasun no deklara tan katak depoisde akontesimentu ne'e sira sidauk di'ak malu to'o agora.

Alegasaun finál

Prokuradór haktuir katak, arguida konfesa faktu hotu iha akuzasaun no ofendidu mós konfirma faktu sira iha akuzasaun, nune'e prokuradór konsidera arguida provadu komete krime hasoru ofendidu, nune'e atu prevene arguida nia hahalok ne'e iha futuru hodi labele halo tan hahalok krime hasoru ema seluk, husu ba tribunál atu kondena arguida ho pena prizaun fulan rua suspende ba tinan ida.

Entretantu, defeza haktuir katak ofendidu ho kondisaun lanu duni arguida ho oan sira ne'e mak arguida nervozu hodi komete aktu ne'e hasoru ofendidu, arrepende ninia hahalok no foin primeiravés mai hatan iha tribunál, tanba ne'e husu ba tribunál fó pena ne'ebé adekua ba arguida.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguida konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguida ho pena multa US\$30.00 ne'ebé arguida sei selu 0,50 sentavus kada loraun durante loraun 60. Tribunál mós fiksa pena alternativa durante loraun 40 prizaun, bainhira arguida la kumpri pena multa refere.

2. Krime falsidade iha depoimentu ka deklarasaun

Nú. Prosesu	: 0014/24. PDBAU
Kompozisaun tribunál	: Singulár
Juisa	: Dra. Sribuana da Costa
Prokuradór	: Dr. Julio da Silva Correia
Defeza	: Dr. Sidónio Maria Sarmiento
Desizaun	: Pena prizaun fulan 6 suspende ba tinan 1

Iha 04 Feveireiru 2025, Tribunál Judisiál Primeira Instánsia Baukau prezide leitura sentensa ba krime falsidade iha depoimentu ka deklarasaun ne'ebé envolve arguida JAdSS hasoru estadu RDTL, iha Munisípiu Vikeke.

Akuzasaun Prokuradór

Prokuradór akuza katak iha, 17 Juñu 2022, iha oras tuku 11:14 dadeer, arguida presta nia depoimentu iha perante prokuradór nu'udar sasin katak "*nia kaben buti sira nia oan nia kakorok*" iha kedas sasin nia oin tanba de'it sasin ho nia kaben diskute malu kona-ba atu fase roupa. Maibé iha julgamentu, arguida deklara katak nia ho nia kaben diskute malu kona-ba atu fase roupa, tanba ne'e arguida nervozu ba apresenta keixa iha ministériu públiku katak "*nia kaben buti sira nia oan nia*

kakorok” no arguida mós hanorin sira nia oan atu ko’alia tuir saida mak arguida ko’alia.

Prokuradór akuza arguida kontra artigu 278 (1) KP kona-ba falsidade iha depoimentu ka deklarasaun ho moldura penál to’o tinan 3 ka multa.

Produsaun ba prova sira

Iha prosesu julgamentu, argiuda deklarata katak momentu julgamentu ne’e arguida ho kondisaun gravida no antes mai julgamentu hetan presaun hosi nia la’en katak labele deklarata kona ba faktu ne’e sela’e ita husik malu ho razaun hirak ne’e mak arguida deklarata tuir nia la’en nia hanoin.

Alegasaun finál

Prokuradór haktuir katak mezmua arguida nega faktu sira iha akuzasaun no razaun seluk maibé momentu arguida nu’udar sasin juramentu perante tribunál mak deklarata katak “deklarasaun iha Ministériu Públiku ne’e nervozu mak inventa istoria maibé loos mak nia kaben la buti sira nia oan nia kakorok ho razaun hirak ne’e mak momentu tribunál absolve tiha arguida nia kaben hosi prosesu. Tanba ne’e prokuradór la iha duvida mezmua arguida uza tan senariu seluk atu bosok tribunál ho razaun hirak ne’e husu ba tribunál atu kondena arguida ho pena prizaun tinan rua suspende ba tinan rua.

Entretantu, defeza haktuir katak momentu arguida gravida ho ta’uk tuir nia kaben nia orientasaun hodi deklarata bosok iha tribunal karik arguida la tuir mak dezisaun tribunál nian arguida nia kaben tama prizaun se mak atu tau matan ba sira nia oan sira. Razaun hirak ne’e husu ba tribunál fó pena ne’ebé kmaan ba arguida.

Desizaun

Depoisde avalia faktu hotu, tribunál prova katak faktu iha akuzasaun procurador nian provadu hotu, mezmua arguida nega maibé tribunál fiar liu ba procurador nia akuzasaun katak arguida komete krime falsidade iha depoimentu ka deklarasaun.

Bazeia ba faktu provadu sira ne’e hotu no tetu mós ho sirkunstánsia hotu-hotu ne’ebé haleu krime ne’e, nune’e tribunál konklui prosesu ne’e no kondena arguida ho pena prizaun fulan neen suspende ba tinan ida.

3. Krime ofensa ba integridade fízika simples

Nú. Prosesu	: 0042/23. VQWTL
Kompozisaun Tribunál	: Singulár
Juisa	: Dra. Maria Modesta d. A. Viera
Prokuradór	: Dr. Julio da Silva Correia
Defeza	: Dr. António Fernandes
Desizaun	: Pena multa US\$45.00

Iha 04 Feveireiru 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ne’ebé envolve arguidu Jose Ajevedo Mesak hasoru ofendidu Janeiro Pinto, iha Suku Matahoi Postu Administrativu Uatulari, Munisípiu Vikeke.

Akuzasaun Prokuradór

Prokuradór akuza katak iha 11 Setembru 2023, iha oras tuku 11:30 dadeer, ofendidu sai hosi eskola atu fila ba uma, arguidu hein iha dalan hodi tuku dala ida iha ofendida nia matan fukun parte loos, tuku dala barak iha ulun, tuku dala ida iha ibun, tebe dala ida iha hirus matan no tebe dala barak iha ofendidu nia knosen.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'ó tinan 3 ka multa.

Produsaun ba prova sira

Iha prosesu julgamentu, arguidu deklara katak iha 14 Setembru 2023, bainhira arguidu fila hosi halo uma lisan, ofendida ho nia maluk sira baku arguidu iha dalan, liu semana ida mak arguidu hein fali ofendidu iha dalan baku fali ofendidu hanesan faktu sira iha akuzasaun maibé la tebe ofendidu. Arguidu haree ofendidu raan ne'e mak arguidu hasai nia faru hodi hamos fali ofendidu nia kanek no hakuak fali ofendidu. arrepende ninia hahalok no foin primeiravés mai hatan iha tribunál.

Alende ne'e, ofendidu konfirma faktu sira iha akuzasaun no deklara tan katak antes ofendidu la iha problema ho arguidu momentu ofendidu sai hosi eskola mak derepente arguidu tuku komete aktu sira ne'e hasoru ofendidu.

Alegasaun finál

Prokuradór haktuir katak bazeia ba produsaun prova arguidu konfesa faktu sira seluk maibé nega mak la tebe ofendidu nia hirus matan, ofendidu nafatin konfirma akuzasaun katak ofendidu hetan tuku no tebe hosi arguidu, nune'e arguidu nia aktu ne'e priense krime ne'ebé akuza ba arguidu. Tanba ne'e husu ba tribunál atu kondena arguidu ho pena prizaun fulan tolu suspende ba tinan ida

Entretantu, defeza haktuir katak arguidu konfesa parsial tuir hahalok ne'ebé nia halo, arrepende ninia hahalok no foin primeiravés mai hatan iha tribunál. Tanba ne'e husu ba tribunál fó pena ne'ebé justu ba arguidu.

Desizaun

Depoide avalia faktu hotu, tribunál prova katak faktu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

4. Krime maus-tratus ba kónjuje

Nú. Prosesu	: 0059/23. VQVQQ
Kompozisaun Tribunál	: Koletivu
Juisa	: Dra. Maria Modesta d. A. Viera, Dra. Albertina da Concição das Neves no Dra. Maria Solana Fernandes
Prokuradór	: Dr. Bartolomeu de Araújo
Defeza	: Dr. Germano Guterres Ramos

Desizaun

: Pena prizaun tinan 2 suspende ba tinan 2

Iha 12 Feveireiru 2025, Tribunál Judisiál Primeira Instánsia Baukau prezide leitura akordaun ba krime maus-tratus ba kónjuje ne'ebé envolve arguidu AP hasoru nia feen, iha Munisípiu Vikeke.

Akuzasaun Prokuradór

Prokuradór akuza katak, loron no fulan haluha ona maibé iha tinan 2022, arguidu tuku dala barak iha ofendida nia kanuruk. Antes mosu diskusaun kona-ba sira nia oan ki'ik tanis.

Tuir mai iha loron no fulan haluha maibé nafatin iha tinan 2022, arguidu basa dala barak ofendida nia hasan parte loos no karuk, antes agresaun ne'e, arguidu ho ofendida diskute malu kona-ba sira nia oan ki'ik tanis.

Iha 01 Outubru 2023, iha oras tuku 23:00 kalan, arguidu tuku dala haat iha ofendida niaibun, tuku dala barak iha kotuk laran no buti iha ofendida nia kakorok no soe sai ofendida nia rounpa. Antes agresaun ne'e, arguidu ho ofendida diskute malu kona-ba arguidu tama uma kalan boot.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(b), 35(a) no 36 LKVD.

Produsaun ba prova sira

Iha produsaun prova, arguidu deklara katak faktu no motivaun problema iha akuzasaun ne'e loos hotu, foin primeiravés mai hatan iha tribunál, di'ak malu ona, to'o agora la baku ona ofendida no arguidu nu'udar agrikultór rezultadu hodi sutenta de'it ba família.

Alende ne'e, ofendida konfirma faktu sira iha akuzasun no deklara katak iha akontesementu ikus iha 01 Outubru 2023, ofendida ba halo tratamentu iha sentru saúde no hela iha uma-mahon durante loron haat no depoisde fila hosi uma-mahon foin di'ak malu fali ho arguidu no to'o agora arguidu la baku ona ofendida.

Alegasaun finál

Prokuradór haktuir katak arguidu provadu komete krime maus-tratus ba kónjuje no halo tratamentu kruel hasoru ofendida nu'udar nia feen, akuzasaun prokuradór nian provadu mezmu sira di'ak malu ona. Tanba ne'e husu ba tribunál atu kondena arguidu ho pena minimu hosi krime ne'e.

Entretantu, defeza haktuir katak bazeia ba produsaun ba prova sira hanesan arguidu kolabora ho tribunál, konfesa faktu sira, arrepende ninia hahalok no foin primeiravés mai hatan iha tribunál. Tanba ne'e husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak faktu iha akuzasaun procurador nian provadu hotu bazeia konfisaun arguidu nian no konfirma mós hosi ofendida.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál no sirkutansia agravante hanesan baku bei-beik ofendida nu'udar feen, nune'e tribunál konklui prosesu ne'e no kondena arguidu ho pena prizaun tinan rua supende ba tinan rua.

5. **Krime ofensa ba integridade física simples ho natureza violénsia doméstika**

Nú. Prosesu : 0116/23. BCSIC
Kompozisaun Tribunál : Singulár
Juisa : Dra. Maria Solana Fernandes
Prokuradór : Dr. Ambrósio Rangel Freitas
Defeza : Dr. Sidónio Maria Sarmiento
Desizaun : Pena prizaun fulan 3 suspende ba tinan 1

Iha 17 Feveireiru 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu CJdC hasoru nia feen, iha Munisípiu Baukau.

Akuzasaun Prokuradór

Prokuradór akuza katak, iha 25 Juñu 2023 iha oras tuku 22:00 kalan arguidu haruka ofendida ba buka sira nia oan feto ne'ebé mak kalan ona seidauk tama uma, ofendida la ba buka maibé ofendida ba fali haris fatin, arguidu hirus foti fatuk tuda ofendida nia ulun, rezulta kanek no raan no ofendida konsege ba halo tratamentu iha Opsitál Baukau no hetan suku pontu tolu.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a) no 35(b) no 36 LKVD.

Produsaun ba prova sira

Iha prosesu julgamentu, arguidu deklara katak arguidu fila hosi toos haree sira nia oan feto laiha ne'e mak arguidu haruka ofendida ba buka tuir, tanba ofendida ho kondisaun lanu no la buka sira nia oan ne'e mak arguidu hirus kaer ofendida nia ulun riba ba rai mak ulun kona fatuk hetan kanek la'os tuda ho fatuk. depoisde akontese liu semana rua sira di'ak malu fali, arrepende ninia hahalok tanba forma família dezde 1992, iha oan na'in lima foin primeiravés baku ofendida no arguidu nu'udar agrikultór ho rendimentu ne'ebé la fiksu.

Alende ne'e ofendida konfirma totalmente faktu sira iha akuzasaun, depoisde akontese ofendida hela iha uma-mahon durante semana rua hafoin arguidu ba tuir no sira fila fali ba uma no to'o agora moris hamutuk nafatin nu'udar feen ho la'en no arguidu mós la baku ona ofendida.

Alegasaun finál

Prokuradór haktuir katak mezmú arguidu konfesa parsial maibé prokuradór fiar liu ba ofendia nia deklarasaun ne'ebé konfirma akuzasaun katak arguidu uza fatuk tuda ofendida nia ulun, mezmú sira di'ak malu ona maibé atu evita arguidu repete ninia aktu ne'e iha futuru husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak arguidu deklara faktu ne'ebé nia komete, arrepende ninia hahalok, di'ak malu ho ofendida no foin primeiravés mai hatan iha tribunál, nune'e husu ba tribunál atu kondena arguidu ho fó pena ne'ebé kmaan.

Desizaun

Depoisde avalia faktu hotu, tribunál prova katak arguidu tuda ofendida nia ulun, rezulta kanek no raan.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

6. Krime ofensa ba integridade fizika simples ho natureza violénsia doméstika

Nú. Prosesu	: 0083/23.BCBCV
Kompozisaun Tribunál	: Singulár
Juisa	: Dra. Maria Modesta d. A. Viera
Prokuradór	: Dr. Julio da Silva Correia
Defeza	: Dr. Sidónio Maria Sarmiento
Desizaun	: Pena admoestasaun

Iha 17 Feveireiru 2025, Tribunál Judisiál Primeira Intánsia Baukau, prezide leitura sentensa ba krime ofensa ba integridade fizika simples ho natureza VD ne'ebé envolve arguida AdSG hasoru nia kuñada, iha Munisípiu Baukau

Akuzasaun Prokuradór

Prokuradór akuza katak, iha 05 Juñu 2024, iha oras tuku 10:00 dadeer, arguida tebe ofendida nia kelen parte karuk rezulta bubu no moras, basa dala ida iha ofendida nia hasan parte loos rezulta bubu metan no moras. Antes agresaun ne'e, arguida ho ofendida diskute malu kona ba dezintendementu iha uma laran.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a) no 35(b) no 36 LKVD.

Produsaun ba prova sira

Iha prosesu julgamentu, arguida deklara katak faktu sira iha akuzasaun ne'e loos hotu, ofendida ho arguida hela hamutuk iha uma ida, arguida halo agresaun tanba ofendida tolok arguida, depoisde akontesimentu ne'e di'ak malu ona, arrepende ninia hahalok no foin primeiravés mai hatan iha tribunál

Prokuradór husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona, defeza la iha opozisaun, tribunál konsidera pedidu ne'e hodi hodi presinde ofendida ninia deklarasaun.

Alegasaun finál

Prokuradór haktuir katak akuzasaun prokuradór nian provadu bazeia ba arguida nia deklarasaun katak arguida halo duni agresaun hasoru ofendida nu'udar nia kuñada no hela hamutuk iha uma ida. Tanba ne'e husu ba tribunál fó pena admoestasaun ba arguida.

Entretantu, defeza haktuir katak arguida konfesa no nia halo aktu ne'e tanba la simu ofendida tolok nia, di'ak malu ona, arrepende ninia hahalok no foin primeiravés mai hatan iha tribunál. Tanba ne'e husu ba tribunál atu aplika pena ne'ebé justu ba arguida.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguida konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguida ho pena admoestasaun.

7. Krime ofensa ba integridade fizika simples ho natureza violénsia doméstika

Nú. Prosesu	: 0033/24. VQVQQ
Kompozisaun Tribunál	: Singulár
Juisa	: Dra. Albertina da Conceição das Neves
Prokuradór	: Dr. Julio da Silva Correia
Defeza	: Dr. Greogorio M. L de Lima
Desizaun	: Pena admoestasaun

Iha 17 Fevereiro 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguida FdS hasoru nia oan entiada, iha Munisípiu Vikeke.

Akuzasaun Prokuradór

Prokuradór akuza katak, iha 24 Abril 2024, iha oras tuku 14:00 meuidia, arguida dudu ofendida rabat kalen dapur nian, nune'e kalen koa ofendida nia ain parte loos, depoisde arguida ba foti tan ai-sanak hodi baku ba ofendida nia liman parte loos. Antes agresaun ne'e, arguida haruka ofendida atu fase bikan maibé ofendida lakohi, nune'e arguida hodi halo agresaun hasoru ofendida.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3 no 35 (b) no 36 LKVD.

Produsaun ba provas sira

Iha prosesu julgamentu, arguida deklara katak faktu no motivu problema iha akuzasaun ne'e loos hotu, foin primeiravés mai hatan iha tribunál, di'ak malu ona, arrepende ninia hahalok.

Alende ne'e, ofendida konfirma faktu sira iha akuzaasun no deklarasaun tan katak depoisde akontese sira di'ak malu ona no to'o agora arguida la baku ona ofendida.

Prokuradór husu ba tribunál atu presinde testemuña ninia depoimentu tanba arguida konfesa integralmente ba faktu hotu iha akuzasaun inklui ofendida mós konfirma akuzasaun, Defeza la iha opozisaun, nune'e tribunál presinde testemuña ninia depoimentu.

Alegasaun finál

Prokuradór haktuir katak, arguidu provadu komete krime ofensa ba integridade fízika simples ho natureza VD hasoru ofendida nu'udar nia oan entiada ne'ebé hela hamutuk ho arguida. Tanba ne'e husu ba tribunál fó pena admoestasaun ba arguida.

Entretantu, defeza husu ba tribunál atu fó pena ne'ebé adekuadu ba arguida ho konsiderasaun katak arguida konfesa, arrepende ninia hahalok no foin primeiravés mai hatan iha tribunál.

Desizaun

Depoisde avalia faktu hotu tribunál prova katak akuzasaun prokuradór nian provadu hotu.

Bazeia ba faktu provadu sira ne'e no tetu mos ho sirkunstánsia atenuante sira hanesan arguida konfesa faktu sira, arrepende ninia hahalok no foin primeiraves mai hatan iha tribunál, nune'e tribunál konkuli prosesu ne'e no kondena arguida ho pena admoestasaun.

8. Krime ofensa ba integridade fízika simples ho natureza violénsia doméstika

Nú. Prosesu	: 0082/23. LASIC
Kompozisaun Tribunál	: Singulár
Juisa	: Dra. Albertina da Conceição das Neves
Prokuradór	: Dr. Bartolomeu de Araújo
Defeza	: Dr. Albino de Jesus Perreira
Desizaun	: Pena multa US\$15.00

Iha 18 Feveiru 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu AdS hasoru nia feen, iha Munisípiu Lautein.

Akuzasaun Prokuradór

Prokuradór akuza katak, iha 29 Dezembru 2023 iha oras tuku 19:00 kalan arguidu tuku dala rua iha ofendida nia ulun. Antes ne'e, arguidu ho ofendida diskute malu kona-ba arguidu fila hosi toos hamrook no husu bee ba ofendida maibé ofendida la hatan ne'e mak arguidu hirus.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a) no 35(b) no 36 LKVD.

Produsaun ba prova sira

Iha prosesu julgamentu, argudu deklarata katak faktu iha akuzasaun ne'e loos hotu, depoisde akontese sira di'ak malu kedas, arrepende ninia hahalok tanba forma familia dezde 2010, iha oan na'in hitu foin primeiraves baku ofendida no arguidu nu'udar agrikultór ho rendimentu la fiksi.

Prokuradór husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona, defeza la iha opozisaun, tribunál konsidera pedidu ne'e hodi hodi presinde ofendida ninia deklarasaun.

Alegasaun finál

Prokuradór haktuir katak haree ba produsaun prova arguidu nia aktu ne'e priense krime ofensa simples ho natureza violénsia doméstika hasoru ofendida nu'udar nia feen mezmua sira di'ak malu ona, maibé nafatin husu tribunál atu kondena arguidu ho pena multa US\$40.00.

Entretantu, defeza haktuir katak arguidu konfesa faktu ho integralmente, moris hamutuk kleur foin primeiraves halo agresauun hasoru ofendida, di'ak malu ona, arrepende ninia hahalok. Tanba ne'e husu ba tribunál fó pena admoestasaun ba arguidu.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiraves mai hatan iha tribunál, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu 0,50 sentavus kada loraun durante loraun 30. Tribunál mós fiksa pena alternativa durante loraun 20 prizaun, bainhira arguidu la kumpri pena multa refere.

9. Krime obstrusaun ba liberdade atu hili

Nú. Prosesu	: 0050/23.PDBAU
Kompozisaun Tribunál	: Singulár
Juisa	: Dra. Maria Modesta d. A. Viera
Prokuradór	: Dr. Ambrósio Rangel Freitas
Defeza	: Dr. Germano Ramos Guterres
Desizaun	: Pena multa US\$40.00

Iha 19 Feveiru 2025, Tribunál Judisiál Primeira Instánsia Baukau, prezide leitura sentensa ba krime obstrusaun ba liberdade atu hili ne'ebé envolve arguidu José Amaral hasoru ofendidu Salvador Amaral, iha Suku Uaitame, Postu Administrativu Watulari, Munisípiu Vikeke.

Akuzasaun Prokuradór

Prokuradór akuza katak arguidu nu'udar militante Partidu CNRT no iha altura ne'e tempu kampaña Eleisaun Parlamentár, iha 08 Maiu tinan 2023, iha dadeer

arguidu ba iha ofendidu nia uma ne'ebé situada iha area Uma Ki'ik, Suku Uaitame, Postu administrativu Watulari depois arguidu hateten ba ofendidu katak *"vota ba CNRT para manan no sei haruka ó nia oan ba eskola iha rai liur"* no husu ofendidu nia kartaun eleitoral, arguidu fó tan osan US\$25.00 ba ofendidu para vota ba CNRT.

Prokuradór akuza arguidu kontra artigu 234 (1) KP kona-ba obstrusaun ba liberdade atu hili ho nia moldura penál to'o tinan 3 ka multa.

Produsaun ba prova sira

Iha prosesu julgamento, arguidu deklara katak nu'udar militante partidu CNRT no ko'alia duni ba ofendidu atu vota ba partidu CNRT no fó osan US\$25.00 ba ofendidu tanba ofendidu nu'udar oan sarani batizmu la'os haruka atu vota ba partidu CNRT.

Iha parte seluk ofendidu deklara katak, arguidu mai bei-beik ofendidu nia uma hodi dehan ba ofendidu atu vota ba partidu CNRT, iha 08 Maiu 2023 arguidu fó osan US\$25.00 ba ofendidu no dehan CNRT mak manan ofendidu nia oan ba eskola iha rai liur. Tanba ofendidu nu'udar militante partidu FRETILIN simu osan refere hasai ho fotografia no manda ba coordenador Partidu FRETILIN iha Watulari.

Testemuña Moises Correia da Silva nu'udar kordenadora partidu FRETILIN Watulari depoimentu katak antes partidu balun lori osan fó ba ema atu vota ba sira nia partidu, nune'e nia orienta militante hotu katak karik ema ruma halo aktu hanesan ne'e hasai foto no halo video, Iha 08 Maiu 2023, testemuña simu gravasaun video ida hosi ofendidu katak arguidu fó osan US\$25.00 ba ofendidu ho objetivu vota ba partidu CNRT.

Alegasaun finál

Prokuradór haktuir katak mezmú arguidu koko atu nega faktu balun, maibé ofendida konfirma faktu hotu iha akuzasaun no testemuña mós depoimenta katak simu vídeo no foto gráfia hosi ofendidu. Tanba ne'e husu ba tribunál atu kondena arguidu ho pena multa US\$60.00.

Entretantu, defeza haktuir katak arguidu konfesa parsialmente, arguidu fó duni osan ba ofendidu ho konsiderasun nu'udar oan sarani batizmu la'os fó osan ho intesaun atu vota ba partidu CNRT. Tanba ne'e husu ba tribunál fó pena ne'ebé justu ba arguidu.

Desizaun

Depoisde avalia faktu hotu, tribunál prova katak faktu iha akuzasaun procurador nian provadu hotu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$40.00 ne'ebé arguidu sei selu 0,50 sentavus kada loron durante loron 80. Tribunál mós fiksa pena alternativa durante loron 53 prizaun, bainhira arguidu la kumpri pena multa refere.

10. Krime violasaun domisili no danu simples

Nú. Prosesu : 0035/22.BCQLC
Kompozisaun Tribunál : Singulár
Juisa : Dra. Sribuana da Costa
Prokuradór : Dr. Ambrósio Rangel Freitas
Defeza : Dr. António Fernandes
Desizaun : Pena prizaun tinan 1 fulan 6 suspende ba tinan 2

Iha 19 Feveiru 2025, Tribunál Judisiál Primeira Instánsia Baukau, prezide leitura sentensa ba krime violasaun domisiliu no danu simples ne'ebé envolve arguidu Carlito Francisco Morais hasoru ofendidu/a Teodolinda Gaio, Terezinha Perreira, Avelina Mendonça Perreira no Sidónio Correia, iha Suku Afasa, Postu Administrativu Kelikai, iha Munisípiu Baukau.

Akuzasaun Prokuradór

Prokuradór akuza katak, iha 29 fulan Outubru 2022, iha oras tuku 22:00 kalan, arguidu Carlito Francisco Morais ho nia grupu mai asaltu, ataka no tama ofendidu/a Teodolinda Gaio, Terezinha Perreira, Avelina Mendonça Perreira no Sidónio Correia nia uma no tuda estraga uma, kadeira, mákina bomba bee no motor. Arguidu halo nia asaun hodi hamosu prezuiju ba ofendida Teodolinda Gaio ho valor US\$330.00, prezuiju ba Terezinha Perreira ho valor US\$168,50. prezuiju ba ofendida Avelina Mendonça Perreira ho valor US\$340.00, no prezuiju ba ofendidu Sidónio Correia ho valor US\$464,50.

Prokuradór akuza arguidu komete krime konkursu kontra artigu 35 (1) KP kona-ba krime iha konkursu, artigu 185 (1) KP kona-ba violasaun domisiliu ho moldura penal to'o tinan 2 ka multa no artigu 285 (1) KP kona-ba danu simples ho moldura penal to'o tinan 3 ka multa.

Produsaun ba prova sira

Iha prosesu julgamento, arguidu nega totalmente ba faktu sira iha akuzasaun. Arguidu mós deklara katak Problema akontese iha tuku 22:00 kalan, arguidu laiha koñesimentu, tanba momentu ne'eba arguidu konduz kareta ho marka carry hosi direasaun Dili mai to'o suku Namanei. Iha fali tuku 3:00 madrugada, atu tula nuu lori fali ba fa'an iha Dili no tuku 7:00 dadeer, arguidu sa'e hela nuu derepenti polísia mai kaptura arguidu lori ba eskuadra PNTL hodi halo investigasaun.

Alende ne'e, ofendida Terezinha Perreira deklara katak, momentu ne'e haree arguidu iha kedas oin hatais faru kór mutin no kalsa badak kór metan, arguidu la estraga nia sasan sira no tuda nia uma maibé arguidu nia kolega sira mak estraga hafoin arguidu mak ko'alia netik fali ba nia kolega sira dehan labele ona baku no tuda uma. Ofendida nia uma lutu haleu maibé arguidu ho nia maluk uza forsa tama deit ba laran mezmú ofendida la aseita.

Ofendida Avelina Mendonça Perreira deklara katak, nia haree arguidu tuda ofendida nia uma, taa ofendida nia tripleks mahar rua, baku rahun kadeira masa lima no lampu eletrisidade. Arguidu atu tama mai uma laran mak ofendida halai ba taka odamatan arguidu tebe rahun tan nia odamatan maibé arguidu la tama liu ba uma laran. Ofendida nia uma lutu haleu maibé arguidu ho nia maluk uza forsa tama deit ba laran mezmú ofendida la aseita.

Ofendidu Sidónio Correia deklara katak nia simu informasaun husi polísia dehan nia motor ne'ebé para hela iha ofendida Avelina Mendonça Perreira nia uma ema baku rahun. Depoisde ofendidu to'o iha fatin akontesimentu ofendida Avelina Mendonça Perreira mak hateten katak motor ne'e arguidu mak baku rahun.

Ofendida Teodolinda Gaio deklara katak, nia haree arguidu hosi didin kuak hetan arguidu ho nia maluk na'in rua seluk ne'ebé ofendida la kuñese, ofendida haree arguidu kaer hela fatuk tuda ofendida nia uma no baku rahun uma ne'ebé didin ho kalen.

Alegasaun finál

Prokuradór haktuir katak arguidu nega totál faktu sira ne'ebé akuza ba arguidu, maibé bazeia ba ofendidu/a nia deklarasaun iha julgamentu faktu sira iha akuzasaun ne'e provadu hotu. ofendida Terezinha Perreira haree ho matan katak arguidu mak hapara nia maluk seluk dehan to'o ona, arguidu nia aktu hanesan ko-autór tanba ho nia grupu nafatin kontinua ba estraga ofendida sira seluk nia uma no sasan tanba ne'e arguidu nafatin prátika krime danu simples no violasaun domisiliariu tanba arguidu tama ba ofendidu sira nia uma sein autorizasaun. Tanba ne'e solisita ba tribunál atu kondena arguidu ho pena únika tinan rua prizaun suspende ba tinan tolu.

Entretantu, defeza haktuir katak arguidu nega faktu hotu tanba arguidu la iha fatin akontesimentu, tuir ofendidu sira nia deklarasaun asaun ne'ebé akontese ne'e kompostu hosi ema barak no la hatene motivu hosi akontesementu. Tanba ne'e husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak tau krebilidade ba ofendidu/a sira nia deklarasaun katak arguidu ho ko-autoria komete krime violasaun domisiliu no danu simples hasoru ofendidu sira.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ida fulan neen suspende ba tinan rua.

11. **Krime ofensa ba integridade fízika simples ho natureza violénsia doméstika**

Nú. Prosesu : 0004/24. BCLGA
Kompozisaun Tribunál : Singulár
Juisa : Dra. Sribuana da Costa
Prokuradora : Dra. Remizia de Fátima da Silva
Defeza : Dra. Laura Valente Lay
Desizaun : Pena admoestasaun

Iha 19 Feveiru 2025, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguida TIG hasoru nia la'en, iha Munisípiu Baukau.

Akuzasaun Prokuradora

Prokuradora akuza katak iha, 29 Feveiru 2024 iha oras tuku 21:00 kalan, ofendidu ko'alia ho telefone iha uma laran derepente arguida mai loke odamatan hodi dehan *"ó mak lor-loron ko'alia ho feto liuhosi telefone hela de'it, ofendidu hatan ó la iha direitu manda hau"*. Arguida nervozu tebe odamatan no odamatan katik kona ofendidu nia ulun hetan kanek no raan, resulta ofendidu lakon konsensia no monu ba rai.

Prokuradora akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3, 35(b) no 36 LKVD.

Produsaun ba prova sira

Prosesu julgamentu, arguida deklara katak faktu iha akuzasaun ne'e loos hotu, arguida mós deklara katak ofendidu iha uma de'it lakohi ba buka serbisu, osan laiha no hahan laiha ofendidu la interese no ofendidu lor-loron mak halimar telefone de'it, di'ak malu ona, arrepende ninia hahalok no foin primeiravés mai hatan iha tribunál.

Alende ne'e, ofendidu konfirma faktu sira iha akuzasun no deklara tan katak depoisde akontese di'ak malu ona, to'o agora arguida la halo ona agresaun hasoru ofendidu.

Alegasaun finál

Prokuradora haktuir katak, arguida konfesa faktu ne'ebé inputa ba arguida motivasaun ne'e loos maibé aktu ne'ebe arguida halo ne'e mak krime, arguida no ofendida durante forma família foin primeiravés arguida halo agresaun hasoru ofendidu. Tanba ne'e husu ba tribunál fó pena admoestasaun ba arguida.

Alende ne'e, defeza konkorda ho prokuradora nia alegasaun hodi fó pena admoestasaun ba arguida tanba durante moris hamutuk foin primeiravés halo agresaun no ofendidu nu'udar la'en maibé lakohi buka nesiedade uma laran, ne'e mak arguida nervozu halo agresaun hasoru ofendidu.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguida konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguida ho pena admoestasaun.

12. Krime tentativa omisídiu agravadu no arma brankas

Nú. Prosesu	: 0014/21.VQWCB
Kompozisaun Tribunál	: Koletivu
Juis	: Dra. Sribuana Costa no Dra. Maria Modesta d. A. Viera no Dra. Albertina da Conceição das Neves
Prokuradór	: Dr. Julio da Silva Correia
Defeza	: Dr. Gregório M. L. de Lima
Desizaun	: Pena prizaun tinan 5

Iha 20 Fevereiru 2025, Tribunál Judisiál Primeira Instánsia Baukau, prezide leitura akordaun ba krime tentativa omisídiu agravadu no arma brankas ne'ebé envolve arguidu Umberto Abilio Pinto hasoru ofendidu Octaviano Carião da Conceição, iha Suku Irabin de baixo, Postu Administrativu Uatu-Karbau, Munisípiu Vikeke.

Akuzasaun Prokuradór

Prokuradór akuza katak iha 20 Juñu 2021, iha oras tuku 23:00 kalan, ofendidu hamutuk ho nia kolega Rosito no Manuel ba hader ai-funan koremetan iha viziñu nia uma iha área Loku-Loroho, hafoin ida ne'e ofendidu hamutuk ho nia kolega na'in rua ba hola tua sabu iha Sr. Gabriel nia uma. Rosito mak konduz motorizada, Manuel tuur iha klaran no ofendidu tuur iha kotuk. Depoisde hola tiha tua sabu ofendidu ho nia kolega sira fila to'o iha Sr. Jerimias nia haris fatin sorin dalan kloot mak arguidu uza katana taa iha ofendidu nia kotuk laran parte loos.

Prokuradór akuza arguidu kontra artigu 23 KP kona-ba tentativa, artigu 139 (b no f) KP kona-ba omisídiu agravadu no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu, arguidu nega totálmente ba faktu sira iha akuzasaun. Arguidu argumenta katak laiha kuñesimentu ba akontesimentu ne'e tanba arguidu iha tiha nia uma iha Aldeia Taradae, distansia hosi arguidu nia uma ho fatin akontesimentu maizumenus 200 metru no antes laiha problema ho ofendidu.

Alende ne'e, ofendidu deklara katak sira na'in tolu sae hamutuk motor ida ofendidu mak tuur liu iha kotuk mak sira ba hola tua sabu, depoisde sira fila to'o iha dalan kloot besik Sr. Jeremias nia haris fatin derepente ema taa nia nia hosi kotuk kona ofendidu kotuk laran parte loos, ofendidu mós deklara tan katak nia kanek ne'e suku hamutuk pontu sanulu resin ida no baixa iha Ospital HOREX Baukau durante semana rua. ofendidu la hatene se mak taa nia, liu tiha semana ida mak nia kolega Manuel fó hatene ofendidu katak arguidu mak taa.

Entretantu testemuña Rosito Guterres depoimentu katak nia mak konduz motorizada no sira ba hola tua ne'e nia haree arguidu kaer hela katana hamri'ik besik Sr. Jeremias nia haris fatin no sira ba laiha akontesimentu depoisde sira fila mak arguidu taa ofendidu. Nia haree Ofendidu nia raan sai barak entaun nia kesi ho nia jaket lori ba keixa iha polisia no lori liu ba ospital hodi halo tramentu.

Testemuña Manuel Pinto depoimentu katak haree arguidu taa ofendidu no nia rasik mak duni tuir arguidu maibé la konsege kaer.

Alegasaun final

Prokurador haktuir katak arguidu nega total faktu sira ne'ebé akuza ba nia, hosi ofendidu no testemuña sira nia deklarasaun iha julgamentu katak arguidu pratika duni krime tentativa omisidui no arma brankas hasoru ofendidu. Tanba ne'e husu ba tribunál atu kondena arguidu ho pena únika tinan ualu prizaun.

Entretantu, defeza haktuir katak arguidu nega faktu hotu tanba laiha fatin akontesimentu arguidu iha tiha nia uma, parte defeza duvida ho ofendidu no testemuña sira nia deklarasaun perante tribunál, la iha motivu no antes mós la iha problema ho ofendidu. Tanba ne'e parte defeza husu ba tribunál atu absolve arguidu hosi prosesu.

Desizaun

Depoisde avalia faktu hotu, tribunál prova katak bezeia ba ofendidu nia deklarasaun no testemuña sira nia depoimentu no depoisde arguidu taa ofendidu testemuña Rozito asegura kedas ofendidu no testemuña Manuel Pinto duni tuir arguidu maibé la konsege kaer.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan lima kadeia.

13. Krime aktu seksuál ho adolexente

Nú. Prosesu	: 0004/23.VQSIC
Kompozisaun Tribunál	: Singulár
Juisa	: Dra. Maria Modesta d. A. Viera
Prokurador	: Dr. Julio da Silva Correia
Defeza	: Dr. Gregório M. L. de Lima

Desizaun

: Pena prizaun tinan 2 fulan 6 suspende ba tinan 2 fulan 6

Iha 24 Feveiru 2025, Tribunál Judisiál Primeira Intánsia Baukau, prezide leitura sentensa ba krime aktu seksuál ho adolexente ne'ebé envolve arguidu MS hasoru ofendida ho idade tinan 14, iha Munisípiu Vikeke,

Akuzasaun Prokuradór

Prokuradór akuza katak ofendida nu'udar arguidu nia subriña tanba ofendida nia inan arguidu nia feton rasik. Iha loron no fulan ne'ebé la apura iha tinan 2020, altura ofendida mesak no arguidu ba ofendida nia uma derepente arguidu haku'ak ofendida hosi kotuk no rein ofendida no sira rein malu, kontinua ba ofendida nia kuartu laran sira ida-idak hasai nia roupa, arguidu latan ofendida iha kama laran toba sae ofendida nia leten hodi halo relasaun seksuál ho ofendida, ofendida la iha relasaun namora ho ema seluk no foin primeiravés arguidu mak halo relasaun seksuál ho ofendida. Liu loron rua henesan ne'e arguidu halo tan relasaun seksuál nafatin iha ofendida nia kuartu laran, to'o agora ofendida gravida no partus iha 09 Marsu 2023.

Prokuradór akuza arguidu kontra artigu 178 KP kona-ba aktu seksuál ho adolexente ho moldura penál to'o tinan 5.

Produsaun ba prova sira

Iha prosesu julgamentu, arguidu deklara katak faktu sira iha akuzasaun ne'e loos hotu katak ofendida arguidu nia subriña rasik sempre ba vizita ofendida nia uma, arguidu mós deklara katak sira halo relasaun seksuál bebeik to'o ofendida gravida, ikus foin deskobre katak ofendida gravida tanba arguidu sira rezolve ona tuir família ho rezultadu sira labele moris hamutuk nu'udar feen ho la'en tanba relasaun família nu'udar tiu ho subriña no família sira mós lakohi atu sira moris hamutuk.

Alende ne'e ofendida konfirma faktu sira iha akuzasaun no deklara tan katak la iha relasaun namorada ho arguidu, foin primeiravés halo relasaun seksuál ho arguidu depoisde halo relasaun seksuál ofendida sente moras iha ninia orgaun sensitivu, hosi relasaun seksuál ne'e ofendida gravida mak foin deskobre katak ne'e arguidu nia oan tanba ofendida úniku halo relasaun seksuál ho arguidu.

Prokuradór husu ba tribunál atu presinde testemuña ninia deklarasaun, tanba arguidu konfesa integralmente ba faktu hotu iha akuzasaun no ofendida mós konfirma, nune'e faktu sufisiénte ona, defeza la iha opozisaun, tribunál konsidera pedidu ne'e hodi hodi presinde testemuña ninia deklarasaun.

Alegasaun final

Prokuradór haktuir katak arguidu konfesa faktu sira, arguidu hatene ofendida nu'udar nia subriña rasik no arguidu sempre ba vizita/lao ba halimar iha ofendida nia uma, aproveita ofendida nia in esperiênsia arguidu halo relasaun seksúal ho ofendida no nafatin prátika relasaun seksúal bei-beik to'o ofendida grávida. Ofendida konfirma totalmente ba akuzasaun katak arguidu halo duni aktu ne'e hasoru ofendida to'o grávida, arguidu nia aktu ne'e priense aktu seksúal ho adolexente tanba ofendida menus hosi idade tinan 17 tanba faktu akontese ofendida foin idade tinan 14, alende ne'e arguidu nia aktu mós priense artigu 182 (d) KP kona-ba agravaasaun, ofendida nu'udar kolateral, familiar ka afim to'o grau daru'ak (*ofendida arguidu nia feton nia oan rasik*) no priense mós artigu 173 (d) KP kona-ba agravaasaun ofendida tinan ki'ik liu 17. Tanba ne'e husu ba tribunál kondena arguidu ho pena prizaun tinan haat.

Entretantu, defeza haktuir katak haree ba produsaun prova hanesan arguidu konfesa faktu, di'ak malu ona, arrepende ninia hahalok, foin primeiravés mai hatan iha tribunál tanba arguidu nu'udar joven ida sei muda ninia hahalok iha futuro. Tanba ne'e husu ba tribunál fó pena justu/adekuadu ba arguidu.

Desizaun

Depoide avalia faktu hotu, tribunál prova katak faktu iha akuzasaun provadu hotu bazeia ba arguidu nia deklarasaun no ofendida nia konfirmasaun ba akuzasaun no provadu katak arguidu komete krime aktu seksúal ho adolexente hasoru ofendida tanba ofendida idade menus hosi tinan 17 no tribunál indefere artigu 182 (d) kona-ba agravaasaun tanba arguidu ho ofendida la'os relasaun segundu grau maibé terseiru garau ona.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, di'ak malu ona ho ofendida, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua fulan neen suspende ba tinan rua fulan neen.

14. Krime ofensa ba integridade fizika simples ho natureza violênsia doméstika

Nú. Prosesu	: 0016/24. VQWTL
Kompozisaun Tribunál	: Singulár
Juisa	: Dra. Albertina da Conceição das Neves
Prokuradór	: Dr. Julio da Silva Correia
Defeza	: Dr. Germano Guterres Ramos
Desizaun	: Pena multa US\$30.00

Iha 24 Feveiru 2025, Tribunál Judisiál Primeira Instánsia Baukau prezide leitura sentensa ba krime ofensa ba integridade fizika simples ho natureza VD ne'ebé envolve arguidu AA hasoru nia feen, iha Munisípiu Víkeke.

Akuzasaun Prokuradór

Prokuradór akuza katak, iha 12 Marsu 2024, iha oras tuku 08:30 dadeer, arguidu tebe dala ida iha ofendida nia kotuk laran, rasta fuuk, arguidu foti fatuk hodi tuda

ba ofendida maibé la kona. Antes ne'e mosu diskusaun kona-ba arguidu atu fa'an sira nia motor maibé ofendida la aseita.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a) no 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, foin primeiravés mai hatan iha tribunál, di'ak malu ona no to'o agora la baku ona ofendida no arguidu nu'udar agrikultór rezultadu hodi sustenta de'it ba família.

Prokuradór husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona, defeza la iha opozisaun, tribunál konsidera pedidu ne'e hodi hodi presinde ofendida ninia deklarasaun.

Alegasaun finál

Prokuradór haktuir katak arguidu provadu komete krime ofensa ba integridade física simples hasoru ofendida ho natureza violénsia doméstika tanba ofendida nu'udar arguidu nia feen, moris hamutuk iha uma ida. Haree ba arguidu nia aktu ne'e solísita ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza husu ba tribunál atu fó pena ne'ebé kmaan ba arguidu tanba arguidu kolabora ho tribunál, konfesa faktu, di'ak malu ona, arrepende ninia hahalok no primeiravés mai hatan iha tribunál.

Desizaun

Depoisde avalia faktu hotu, tribunál prova katak faktu iha akuzasaun procurador nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

15. Krime ofensas ba integridade física simples ho natureza violénsia doméstika

Nú. Prosesu	: 0025/24 BCSIC
Kompozisaun Tribunál	: Singulár
Juisa	: Dra. Albertina da Conceição das Neves
Prokuradór	: Dr. Julio da Silva Correia
Defeza	: Dr. Sidónio Maria Sarmiento
Dezisaun	: Pena multa US\$30.00

Iha 24 Feveireiru 2025, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu FFM hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 26 Marsu 2024, iha oras tuku 07:00 dadeer, arguidu uza ai-pedasuk baku dala ida iha ofendida nia kabun no baku dala ida iha ofendida nia reen toos rezulta kanek kiik no raan. Antes ne'e, arguidu ho ofendida diskute malu kona-ba sira nia oan ho idade tinan tolu fakar etu no tanis.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a) no 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontesementu ne'e ofendida ba halo tratamentu iha ospital biaxa durante loron tolu no fila hosi ospital sira di'ak malu fali ona, arrepende ninia hahalok no la baku ona ofendida, arguidu nu'udar agrikultór rezultadu hodi sustenta de'it ba familia.

Entretantu, ofendida konfirma faktu sira iha akuzasaun no deklara tan katak ba tratamentu iha ospital no baixa tanba ofendida nia tensaun sae maka'as, depoisde fila hosi ospital sira di'ak malu ona to'o agora no nafatin moris hamutuk nu'udar feen ho la'en.

Alegasaun final

Prokuradór haktuir katak, akuzasaun prokuradór provadu bezeia ba arguidu ho ofendida nia deklrasaun ne'ebé konfirma totalmente ba akuzasaun, mezmu sira di'ak malu ona maibe atu prevene arguidu nia aktu ne'e iha futuro, husu ba tribunál kondena arguidu ho pena prizaun fulan ida suspende ba tinan ida.

Entretantu defeza haktuir katak arguidu konfesa faktu hotu iha akuzasaun, arrepende ninia hahalok, di'ak malu ona ho ofendida no foin primeiraves mai hatan iha tribunál. Tanba ne'e husu ba tribunál fó pena ne'ebé adekua ba arguidu.

Desizaun

Depoisde avalia faktu hotu, tribunál prova katak faktu iha akuzasaun procurador nian provadu hotu.

Bazeia ba faktu provadu sira ne'e no tetu mos ho sirkunstansia atenuante sira hanesan arguidu konfesa faktu hotu, arrepende ninia hahalok no foin primeiraves mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mos fiksa pena alternativa durante loron 20 prizaun, bainhira arguidu la kumpri pena multa refere.

16. Krime ofensa ba integridade fízika simples ho natureza violénsia doméstika no arma brankas

Nú. Prosesu : 0031/23. BCQLC
Kompozisaun Tribunál : Koletivu
Juisa : Dra. Maria Solana Fernandes no Dra. Sribuana da Costa, Dra. Maria Modesta d. A. Viera
Prokuradór : Dr. Bartolomeu de Araújo
Defeza : Dr. Sidónio Maria Sarmiento
Desizaun : Pena prizaun tinan 3
suspende ba tinan 3 ba krime arma brankas no
ba krime ofensa ba integridade física simples
kondena ho pena multa US\$60.00

Iha 24 Feveiru 2025, Tribunál Judisiál Primeira Instánsia Baukau, prezide leitura akordaun ba krime ofensa ba integridade física simples ho natureza VD no arma brankas ne'ebé envolve arguidu SX hasoru nia feen no estadu RDTL, iha Munisípiu Baukau.

Akuzasaun Prokuradór

Prokuradór akuza katak iha 01 Setembru 2023, iha oras tuku 18:00 lokraik, arguidu halo agresaun hasoru ofendida ho maneira buti ofendida nia kakorok dala rua, dudu ofendida ba rai depois arguidu foti katana hodi dehan atu taa ofendida ne'e mak ofendida ta'uk halai ba hato'o keixa iha Eskuadra Polísia Kelikai. Antes ne'e, arguidu ho ofendida diskute malu kona-ba arguidu la ba tuir ofendida iha toos hodi foti fehuk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a) no 35 (b) no 36 LKVD no kontra artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu arguidu deklarata katak faktu iha akuzasaun ne'e loos hotu, depoisde akontese ofendida ba hela iha uma-mahon liu semana ida mak arguidu ho nia ama ba hasoru polísia hodi komunika fali uma-mahon nune'e arguidu ba simu fali ofendida iha uma-mahon Baukau, di'ak malu ona to'o agora la baku ona ofendida, arrepende ninia hahalok, forma família iha tinan 2013 iha oan na'in lima foin primeiravés halo agresaun hasoru ofendida, nu'udar agrikultór rendimentu la fiksu.

Alende ne'e, ofendida mós konfirma ba faktu sira iha akuzasaun no deklarata tan katak durante ne'e la iha problema, momentu arguidu la ba tuir ofendida ba to'os ne'e mak ofendida hirus ko'alia derepende arguidu buti ofendida nia kakorok no uza katana ne'e mak ofendida ta'uk ba hato'o keixa iha Eskuadra Polísia Kelikai, liu semana ida arguidu bolu ofendida iha uma-mahon Baukau kontinua di'ak malu to'o agora la baku ona ofendida.

Alegasaun finál

Prokuradór haktuir katak arguidu konfesa ba faktu hotu iha akuzasaun no konfirma mós hosi ofendida, prokuradór haree katak arguidu nia aktu priense ba faktu ne'ebé imputa ba nia hanesan halo agresaun no altera tiha katana nia

funsau ba krime, razaun hirak ne'e husu ba tribunál atu kondena arguidu ho pena únika tinan tolu suspende ba tinan tolu.

Entretantu, defeza haktuir katak haree ba arguidu nia deklarasaun ne'ebé kopera tebes justisa hodi la difikulta tribunál atu hetan verdade iha kazu ne'e, di'ak malu ona, arrepende ninia hahalok. Tanba ne'e husu ba tribunál fó pena kmaan ba arguidu.

Desizaun

Depoide avalia faktu hotu, tribunál prova katak faktu iha akuzasaun provadu hotu bazeia ba akuzasaun prokuradór nian.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ba krime arma brankas ho pena prizaun tinan tolu suspende ba tinan tolu no kondena arguidu ba krime ofensa ba integridade fizika simples ho natureza VD ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

17. Krime furtu agravadu

Nú. Prosesu	: 0018/22.VQLLT
Kompozisaun Tribunál	: Koletivu
Juisa	: Dra. Maria Modesta d. A. Viera, Dra. Albertina da C. das Neves no Dra. Maria Solana Fernandes
Prokuradór	: Dr. Julio da Silva Correia
Defeza	: Dr. António Fernandes
Desizaun	: Pena prizaun fulan 6 suspende ba tinan 1

Iha 24 Feveireiru 2025, Tribunál Judisiál Primeira Instánsia Baukau, prezide leitura akordaun ba krime furtu agravadu ne'ebé envolve arguidu Luis Soares hasoru ofendidu Cipriano de Carvalho, iha Suku Dilor, Postu Administrativu Lakluta, Munisípiu Vikeke.

Akuzasaun Prokuradór

Prokuradór akuza katak iha 22 Outrubru 2022, iha oras tuku 17:00 lokraik, arguidu hamutuk ho Simão Natalino Gomes, ba iha área karau refere hodi duni no book ofendidu nia karau timur sira ba fali iha área Wetina depois arguidu sulan tiha mak kaer tiha ida kesi iha luhan laran, hafoin telefone Antonio Soares no ba duni fatin refere haree karau no osan karau ne'e ho osan US\$460.00. bainhira ofendidu buka tuir nia karau mak haree karau refere kesi fali iha Antonio Soares nia uma. Karau ne'e ofendidu kontratu ho ema iha tinan 2019, ema sosa karik ho folin US\$550.00.

Loron no fulan haluha maibé iha tinan 2019, iha oras tuku 12:00 meiodia, iha Kanaferre- Lakluta arguidu mesak sulan tiha ofendidu nia karau timur sira hafoin arguidu kaer no kesi karau timur aman ida depois telefone ba ema seluk mai sosa karau refere ho folin US\$350.00

Prokuradór akuza arguidu kontra artigu 252 Nú. 1 (d) KP kona-ba furtu agravadu ho moldura penál tinan 2 to'o tinan 8

Produsaun ba prova sira

Iha prosesu julgamentu, arguidu deklara faktu sira inputa ba nia ne'e loos hotu kedas, katak iha 2019, arguidu fa'an duni ofendidu nia karau ho folin US\$ 350.00 no osan arguidu gasta hotu. Iha 22 Outubru 2022, arguidu kaer tan karau timur aman ida fa'an ba Sr. António soares ho folin US\$460.00, maibé osan arguidu seidak gasta polísia halo apreensaun ona hanesan evidencia. Arguidu mós deklara katak sira rezolve ona tuir kultura arguidu devolve fali karau rua ba ofendidu sira dame malu ona no foin primeiravés mai hatan iha tribunál.

Alende ne'e ofendidu deklara katak sira rezolve ona problema tuir kultura no liu hosi akordu, arguidu devolve fali ona karau rua ba ofendidu.

Alegasaun finál

Prokuradór haktuir katak, arguidu konfesa integralmente ba faktu ne'ebé inputa ba ba arguidu, nune'e faktu sira iha akuzasaun provadu hotu, sira dame malu ona, arguidu mós devolve fali ona karau rua ba ofendidu, haree ba sirkunstánsia atenuante extraordinária katak sira di'ak malu ona. Tanba ne husu ba tribunál atu aplika pena prizaun tinan ida suspende ba tinan rua.

Enkuantu defeza alega katak arguidu konfesa integralmente, haree ba arguidu nia konfisaun, sira diak malu ona, arguidu mós devolve fali ona ofendidu nia karau, arrepende nia hahalok no foin primeiravés mai hatan iha tribunál. Tanba ne defeza husu ba tribunál atu fó pena admoestasaun ba arguidu.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál mós halo atenuasaun ekstraordináriu hodi konklui prosesu ne'e no kondena arguidu ho pena prizaun fulan neen suspende ba tinan ida.

18. Krime danu agravadu

Nú. Prosesu	: 0043/21.BCSIC
Kompozisaun Tribunál	: Koletivu
Juisa	: Dra. Sribuana da Costa, Dra. Albertina da Conceição das Neves no Dra. Maria Modesta d. A. Viera
Prokuradór	: Dr. Ambrósio Rangel Freitas
Defeza	: Dr. Cristovão Nuno Ximenes (Advogadu Privadu)
Desizaun	: Pena multa US\$60.00

Iha 26 Feveireiru 2025, Tribunál Judisiál Primeira Instánsia Baukau, prezide leitura akordaun ba krime danu agravadu ne'ebé envolve arguidu Adilson Gusmão de Freitas hasoru Estadu RDTL iha Baukau Villa, Munisípiu Baukau

Akuzasaun Prokuradór

Prokuradór akuza katak Iha 24 Setembru 2021, iha oras tuku 20:00 kalan, Komandu Munisípiu Baukau orienta testemuña ho nia ekipa atu ba fó apoiu iha Eskuadra Baukau Villa, tanba iha joven balun hemu tua no halo problema iha área refere, bazeia ba orientasaun refere testemuña ho nia ekipa naran Yakobus da Costa, Julio Cardozo, Moises da Costa, Bonifacio Correia ho Sergio dos Reis, sira na'in neen uza kareta marka HILUX, konduz hosi sasin Bonifacio Correia dirije kedas ba Eskuadra Baukau Villa. Banhira sira to'o fatin, haree arguidu la'o ba mai halo barullu ka hakilar, momentu ne'eba arguidu ho kondisaun lanu no la uza faru tanba ne'e testemuña tenta ba hakalma maibé arguidu rejeita, testemuña sira kaer arguidu nia liman no haruka tama ba kareta laran, bainhira tama ba kareta laran arguidu tuku no tebe ba iha kareta nia espelu parte loos rezulta rahun, mezmú nune'e testemuña sira konsege lori aguidu ba hakalma iha komandu PNTL Baukau no direktamente entrega ba iha serbisu investigasaun no tama iha sela laran. Arguidu mós tebe no tuku estraga odamatan sala detensaun nian ne'ebé pertense ba komandu PNTL Baukau.

Prokuradór akuza arguidu kontra artigu 259 (a) KP kona-ba danu agravadu ho nia moldura penál tinan 2 to'o tinan 8.

Produsaun ba prova sira

Iha prosesu julgamento, arguidu konfesa katak faktu sira iha akuzasaun ne'e loos hotu no deklara katak bainhira arguidu sai hosi sela polísia liu loron rua de'it arguidu troka no hadi'a hotu ona sasan sira ne'ebé nia estraga.

Testemuña Paulo da Silva Ribeiro nu'udar membru PNTL konfirma katak arguidu hadi'a no troka hotu ona sasan sira ne'ebé arguidu estraga.

Alegasaun finál

Prokuradór haktuir katak akuzasaun procurador nian provadu tanba arguidu konfesa integralmente ba faktu ne'ebé akuza ba arguidu, haree ba sirkunstánsia ne'ebé iha katak arguidu hadi'a tiha ona prejuizu sira, ida ne'e sai hanesan sirkunstánsia atenuante extraordinaria. Tanba ne'e solísita ba tribunál kondena arguidu ho pena prizaun fulan neen suspende ba tinan ida.

Entretantu, defeza husu ba tribunál atu bele tetu didi'ak tanba arguidu konfesa integralmente no hadi'a hotu ona sasan sira ne'ebé hetan estragu.

Desizaun

Depoisde avalia faktu hotu, tribunál prova katak faktu iha akuzasaun provadu hotu bazeia ba arguidu nia konfisaun katak liu loron rua arguidu hadia sasan ne'ebé arguidu estraga no testemuña mós konfirma katak arguidu hadia ona sasan ne'ebé arguidu estraga.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés

mai hatan iha tribunál no halo atenuasaun extraordinariu, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

19. **Krime ofensa ba integridade fizika simples ho natureza violénsia doméstika**

Nú. Prosesu : 0039/24.VQVQQ
Kompozisaun Tribunál : Singulár
Juisa : Dra. Maria Solana Fernandes
Prokuradór : Dr. Ambrósio Rangel Freitas
Defeza : Dr. Grigorio M.L. de Lima
Desizaun : Pena multa US\$75.00

Iha 26 Feveiru 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fizika simples ho natureza VD ne'ebé envolve arguidu AL hasoru nia nia feen, Munisípiu Vikeke.

Akuzasaun Prokuradór

Prokuradór akuza katak Iha 08 Maiu 2024, iha oras tuku 19:00 kalan, arguidu uza telefone tuda ba ofendida maibé la kona, arguidu foti fali ai-bebak baku dala ida iha ofendida nia tilun hun. Antes ne'e, arguidu ho ofendida diskute malu kona-ba sira nia oan ki'ik oan tanis.

Prokuradór akuza arguidu kotra artigu 145 KP kona-ba ofensa ba integridade fizika simples ho moldura penál to'o tinan 3 ka multa no konjuga ho artigu 2, 3(a) no 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira iha akuzasaun prokuradór nian provadu hotu. Arguidu mós deklara mós katak sira forma família iha tinan 2022, iha oan na'in rua foin primeiravés halo agresaun hasoru ofendida, di'ak malu ona, arrepende ninia hahalok no serbsiu nu'udar agrikultór rezultadu sustenta de'it ba família.

Alende ne'e ofendida deklara katak mosu dksusaun kona-ba labarik tanis derepente arguidu tuda telefone maibé la kona hafoin arguidu foti ai-bebak baku dala iha ofendida nia tilun hun parte loos, depoisde akontese ofendida ba hela iha uma-mahon durante loron haat hafoin arguidu ba tuir sira di'ak malu no fila ba uma to'o agora moris hamutuk nafatin no la baku ona ofendida.

Alegasaun finál

Prokuradór haktuir katak akuzasaun prokuradór nian provadu haree ba arguidu no ofendida nia deklarasaun iha julgamentu katak arguidu halo duni agresaun hasoru ofendida nu'udar nia nia feen. Tanba ne'e husu ba tribunál fó pena multa US\$60.00 ba arguidu.

Entretantu, defeza haktuir katak arguidu konfesa, di'ak malu ona, arrepende ninia hahalok no foin primeiravés mai hatan iha tribunál. Tanba ne'e husu ba tribunál fó aplika pena ne'ebé adekuadu ba arguidu.

Desizaun

Depoide avalia faktu hotu, tribunál prova katak faktu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu US\$1.00 kada loron durante loron 75. Tribunál mós fiksa pena alternativa durante loron 50 prizaun, bainhira arguidu la kumpri pena multa refere.

20. Krime ofensa ba integridade fizika simples ho natureza violénsia doméstika no arma brankas

Nú. Prosesu	: 0003/22 BCBQI
Kompozisaun Tribunál	: koletivu
Juisa	: Dra. Sribuana Costa, Dra. Albertina da Conceição das Neves, Dra. Maria Modesta d. A. Viera
Prokuradór	: Dr. Ambrósio Rangel Freitas
Defeza	: Dr. Horta Ramos
Desizaun	: Pena prizaun tinan 3 suspende ba tinan 3

Iha 27 Fevereiro 2025, Tribunál Judisiál Primeira Instánsia Baukau, prezide leitura akordaun ba kazu ofensa ba integridade física simples ho natureza VD no arma brankas ne'ebé envolve arguidu JAV hasoru nia feen IMG ho nia oan mane IG ho idade (tinan 19) no estadu RDTL, iha Munisípiu Baukau.

Akuzasaun Prokuradór

Prokuradór akuza Katak, iha 18 Fevereiro 2022, iha oras tuku 13:00 meiodia bainhira arguidu fila mai uma, arguidu bolu ofendidu IG *"nokuda,nokuda"*, nune'e ofendida IMG hase'e arguidu katak *"bolu ita nia oan ne'e bolu didiak"*, la'os kuda nia oan mak ó bolu fali *"nokuda,"* nune'e arguidu nervozu lori katana taa dala iha ofendida IMG nia ulun rezulta kanek. Ofendidu IG tenta hadau katana hosi arguidu, ikus katana monu kona fali ofendidu IG nia ain rezulta kanek no arguidu mós buti ofendidu IG nia kakorok.

Prokuradór akuza arguidu komete krime iha konkursu kontra artigu 145 KP kona-ba ofensa ba integridade física simples ho moldura penál tinan 3 ka multa no konjuga ho artigu 2,3(a), 35(b) no 36 LKVD no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu, arguidu nega katak la taa ofendidu sira no argumentu katak momentu ne'e arguidu fila hosi natar kaer ho katana bainhira to'o uma nia

oan sira hase'e arguidu atu han jambua nune'e arguidu mós han jambua. Depois arguidu tama ba uma laran foti bikan atu han derepente ofendidu sira hadau katana iha arguidu nia liman hafoin katana monu kona ofendida IMG nia ulun no kona ofendidu IG nia ain. Arguidu mós deklarata katak deposite akontesimentu ne'e sira moris separa to'o agora.

Alende ne'e, ofendida IMG deklarata katak, iha momentu ne'eba arguidu tun hosi foho mai bolu sira nia oan ho liafuan "*nokuda nokuda*" mak ofendida la simu nune'e arguidu ho ofendida diskute malu arguidu lori katana taa ofendida IMG nia ulun. Arguidu mós atu taa tan ofendida nia kakorok maibé lakonsege tanba sira nia oan ofendidu IG ba hadau katana hosi arguidu mak katana monu kona ofendidu IG nia ain hetan kanek, deposite akontesimentu arguidu ho ofendida la hela hamutuk to'o agora.

Ofendidu IG deklarata katak arguidu bolu nia ho naran "*nokuda nokuda*", "mak nia ofendida IMG hase'e, arguidu la simu lori katana taa iha ofendida IMG nia ulun atu taa tan mak ofendidu halai hosi kotuk ba hadau katana hosi arguidu mak katana monu kona ofendidu nia ain hetan kanek la'os arguidu mak taa no arguidu mós buti ofendidu nia kakorok.

Alegasaun finál

Porkuradór konsidera arguidu nia aktu ne'e provadu tuir akuzasaun prokuradór nian, mezmua iha julgamentu arguidu koko atu nega faktu hotu, maibé ofendida no ofendidu konfirma faktu hotu iha akuzasaun prokuradór nian no deposite akontesimentu ne'e sira hela separa ona. Prokuradór husu ba tribunál atu halo alterasaun ba krime ne'ebé arguidu komete hasoru ofendidu IG hosi artigu 145 KP kona-ba ofensa ba integridade fizika simples ba fali artigu 148 KP kona-ba ofensa ba integridade fizika negligente. Ho nune'e husu ba tribunál atu kondena arguidu ho pena efetiva tinan haat prizaun.

Entretantu, defeza haktuir katak haree ba arguidu nia deklarasaun iha julgamentu katak arguidu nia aktu la priense krime ne'ebé imputa ba nia tanba ofendidu sira mak ba hadau katana hosi arguidu mak katana kona ofendidu sira la'os arguidu mak taa ofendidu sira. Tanba ne'e husu ba tribunál atu absolve arguidu hosi krime ne'e.

Desizaun

Deposite avalia faktu hotu, tribunál prova katak faktu iha kauzasaun ne'e loos hotu bazeia ba ofendida IMG no ofendidu IG nia deklarasaun iha julgamentu katak arguidu provadu komete krime Arma brankas no krime ofensa ba integridade fizika simpels ho natureza VD hasoru ofendida IMG no ofensa simples ho natureza VD hasoru ofendidu IG tanba arguidu mós buti ofendidu IG nia nia kakorok la'os katana de'it mak monu kona ofendidu nia ain.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidufoin primeiravés mai hatan iha tribunál no sirkunstánsia agravante sira hanesan arguidu baku ofendida IMG nu'udar feto/feen ne'ebé forsa la hanesan arguidu inklui ofendidu IG nu'udar oan rasik, nune'e tribunál konklui prosesu ne'e no kondena arguidu ba krime rua ne'e no kada krime tribunál kondena ho pena prizaun fulan tolu no ba krime arma brankas tribunál kondna

ho pena prizaun tinan tolu, tribunál halo komulasaun ba pena hodi kondena arguidu ho pena únika tinan tolu suspende ba tinan tolu.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>